

Tusagassiortunngorniat ilinniartitaanerat pillugu Namminersornerullutik Oqartussat nalunaarutaat

Tusagassiortunngorniat ilinniartitaanerat pillugu Inatsisartut peqqussutaanni nr. 6-imi, 30. oktober 1995-imeersumi § 2, imm. 2, § 4 aamma § 5, imm. 3 naapertorlugit makku aalajangersarneqarput:

Kapitali 1.

Ilinniartitaanerup aqunneqarnera

§ 1. Tusagassiormik Ilinniarfimmi Ilinniagaqarnermi Siunnersuisoqatigiinnik pilersitsisoqassaaq.

Ilinniagaqarnermi Siunnersuisoqatigiit arfineq-marlunnik ilaasortaqaassapput:

- 1) Ilaasortaq ataaseq Ilinniartitaanermut Pisortaqarfimmit toqqagaq.
- 2) Ilaasortaq ataaseq Tusagassiortut Peqatigiiffiannit toqqagaq.
- 3) Ilaasortaq ataaseq Kalaallit Nunaata Radiuanit (KNR) aamma Kalaallit Nunaanni TV-utileqatigiinnit radioutileqatigiinnillu (FTV) toqqagaq.
- 4) Ilaasortaq ataaseq tusagassiuutinit naqitanit nuna tamakkerlugu saqqummersartunit toqqagaq.
- 5) Ilinniarfimmi pisortaq.
- 6) Ilaasortaq ataaseq ilinniarfimmi ilinniartitsisut siunnersuisoqatigiiffiannit toqqagaq.
- 7) Ilaasortaq ataaseq ilinniartut akunnerminni toqqagaat.

Imm. 2. Ilinniagaqarnermi Siunnersuisoqatigiinni ilaasortat siunnersuisoqatigiinni ilaasortaasassapput ilaasortamik pineqartumik toqqaasimasup toqqaasimanerminik utertitsinissaata aammalu nutaamik toqqaanissaata tungaanut.

Imm. 3. Siunnersuisoqatigiinni ilaasortat tamarmik sinniisussaannik toqqaasoqartassaaq.

Imm. 4. Ilinniagaqarnermi Siunnersuisoqatigiit suliassanik pineqartunik inunnik immikkut ilisimasalinnik peqataatitaqartarsinnaapput.

Imm. 5. Ilinniagaqarnermi Siunnersuisoqatigiit siulittaasulerlutik siulittaasullu tullilerlutik namminneq inissitsitissapput. Ilinniagaqarnermi Siunnersuisoqatigiit suleriaasissartik nammi-neerlutik aalajangersartassavaat, tassunga ilanngullugit ulluinnarni aqutsisunik pilersitsineq. Suleriaasissat Ilinniartitaanermut Pisortaqarfimmit akuerineqartassapput.

Imm. 6. Tusagassiormik Ilinniarfik Ilinniagaqarnermi Siunnersuisoqatigiinnut allattoqarfiuvoq.

§ 2. Ilinniagaqarnermut Siunnersuisoqatigiit Tusagassiormik Ilinniarfimmu tunngasunik siunnersuisartuupput aammalu Ilinniartitaanermut Pisortaqarfimmut inassuteqarsinnaallutik.

Imm. 2. Sulilluni sungiusarfiit Ilinniagaqarnermut Siunnersuisoqatigiinnit akuerineqassapput, tak. § 9, imm. 2.

Imm. 3. Ilinniartitaanermut Pisortaqarfik Ilinniagaqarnermi Siunnersuisoqatigiit aamma Tusagassiormik

Ilinniartfimmik oqaaseqaateqartitsereernikkut Ilinniagaqarnermi Siunnersuisoqatigiit malittarisassanik aalajangersaasinnaavoq.

§ 3. Ilinniartfimmi pisortaq Ilinniartitaanermut Pisortaqarfiup inassuteqarneratigut Naalakkersuisunit atorfinitsinneqartassaaq. Ilinniartitsissutitut sammisanut sulianut aalajangersimasunut ilinniartitsisut sulisullu allat Tusagassiornermik Ilinniartfiup inassuteqarneratigut Naalakkersuisunit atorfinitsinneqartassapput.

§ 4. Tusagassiornermik Ilinniartfik ilinniartitaanermut tunngasumik ilinniartitaaneq pillugu aaqqissuussinermik suliaqartassaaq, ikinnerpaamik makkuninnga imaqartussanik

- 1) ilinniartitaanerup imaa, ilinniartitsinermi nalunaaquttap-akunnerisa amerlassusiat aamma ilinniagassani ataasiakkaani ilinniartitsissutissatut sammisassanut ilitersuutit, piffissat immikkut suliaqarfissat suliamillu sungiusarfissat taakkulu ilinniartitaanerup ingerlanerani inissisimaffissaat,
- 2) allattarisassanik suliat tunniunneqartarnissaat pillugit malittarisassat, taakkununga ilanngullugit tunniussat ataasiakkaarluni suleqatigiikkuutaarluniluunniit pisinnaanerat pinissaalluunniit,
- 3) ilinniartitaanerup ingerlanerani misilitsittarnissat allaaserineqarnerat kiisalu taakku ilinniartitaanerup ingerlanerani inissisimanissaat,
- 4) misilitsinnerit ilusaasa atorneqartut allaaserineqarnerat, tassunga ilanngullugit suleqatigiikkuutaarluni misilitsinnerni peqataasut amerlassusissaat,
- 5) misilitsinnerit soorliit karakteriliiffigineqartassanersut pillugit takussutissiat, aammalu misilitsinnerit sorliit naliliiffigineqassasut ima "angusivoq" imaluunniit "angusinngilaq",
- 6) ima naliliinernut "angusivoq" imaluunniit "angusinngilaq" piumasaqaatinut erseqqissaatit,
- 7) napparsimasimanermi soraarummeersitsineq aamma misilitseqqinneq,
- 8) ilinniartunngortussatut nalunaarutigineqartut amerlassusii malillugit atuaqatigiinnik avitsisarnerit kattussisarnerillu pillugit malittarisassat,
- 9) taarsiullugu sulianik tunniussisarnerit,
- 10) ilinniartitsinissamik pilersaarutit, aamma
- 11) takkutinngitsoornernut malittarisassat nalinginnaasut.

Imm. 2. Tusagassiornermik Ilinniartfik pisinnaatinneqarsinnaavoq ilinniartitaanerup aaqqissuussaanerani aalajangersakkanik immikkut ittumik akuersissuteqarnermik imaqartunik ilinniartitaanerup aaqqissuussaanerani aalajangersakkanik ilanngussinissamut.

Imm. 3. Ilinniartitaaneramik aaqqissuussineq Ilinniartitaanermut Pisortaqarfimmut akuerisassanngorlugu nassiunneqartassaaq.

Kapitali 2.

Ilinniartunngortussanik tiguisarnermi piumasaqaatit

§ 5. Tusagassiornermik Ilinniartfik ilinnialerniarlutik qinnuteqaateqartut akuerisinnaavaat:

- 1) ilinniarnertuunngorlutik angusisimasut,
- 2) § 6 naapertorlugu ilinniartunngorniarluni misilitsinnermi angusisimasut,

Imm. 2. Tusagassiornermik Ilinniartfiup qinnuteqartut allamik atuagarsornermut sulinermulluunniit naleqquttunik imalimmik ilinniagallit imm. 1-imi, nr. 2-mi piumasaqaatinik naammassinnissimasut ilinniartunngortussatut akuerisinnaavai.

§ 6. Ilinniartunngorniarluni misilitsissutissaq Tusagassiornermik Ilinniartfimmit suliarineqassaaq. Misilitsissutissaq ilusilerneqassaaq ilinniartunngorniarluni qinnuteqartup tusagassiornermut

tungasutigut eqqarsariaatsimut misikkarissusia, inuiaqatigiinni pissutsit atuuttut pillugit tamatigoortunik ilisimasaqassusia kiisalu oqaatsitigut pisinnaasai saqqummersittussanngorlugit.

Imm.2. Ilinniartunngorniarluni misilitsinneq sumiiffinni assigiinngitsuni ataatsikkut ingerlanneqassaaq piffissaq eqqorlugu qinnuteqaateqarlutik nalunaarsimasunit kiisalu ilinniartunngornissamut piumasaqaatinik allanik, § 5 naapertorlugu, naammassinnittunit peqataaffigineqarluni aamma Tusagassiornermik Ilinniartuup misilitsinnissamut piffissalersuilluni aalajangigai malillugit. Ilinniartimmi pisortaq misilitsinnerit ingerlanneqarnerannut akisussaavoq.

Kapitali 3.

Ilinniartitaanerup imaa il.il.

Ilinniartitaanerup ilusaa

§ 7. Ilinniartitaaneq ukiut pingasut affarluni sivisussuseqartussatut naatsorsuussaavoq piffissanullu immikkoortunut arfineq-marlunnut aggugaalluni, imalu ilusilersugaalluni:

- 1) immikkoortoq siulleg atuagarsorluni sulianullu aalajangersimasunut sammisunik ilinniartitsineruvoq.
- 2) Immikkoortut aappaat sulilluni sungiusarneruvoq.
- 3) Immikkoortut pingajuat atuagarsorfuvoq sulianullu aalajangersimasunut sammisunik ilinniarnaruvoq.

Ilinniagassatut sammisat aaqjissuunneqarnerat piffissallu sulilluni sungiusarfusut

§ 8. Immikkoortumut siullermut ilinniagassatut sammisanut makku ilaapput:

- 1) Tusagassiorneq.
- 2) Oqaatsit.
- 3) Tusagassiorneq attaveqaqatigiinnerlu pillugit atuagarsornikkut ilisimasassat.
- 4) Tusagassiinermi malittarisassaarneq.
- 5) Ileqqorissaarneq/ Pissuserissaarneq.
- 6) Inuiaqatigiilerineq.

Imm. 2. Immikkoortut pingajuannut ilinniagassatut sammisassanut makku ilaapput:

- 1) Tusagassiorneq.
- 2) Inuiaqatigiilerineq.
- 3) Oqaatsit.

Imm. 3. Ilinniartitaanermut Pisortaqarfik, pissutsit immikkut ittut atuutsillugit ilinniartitaanerulluunniit ineriartortinneqarneranut ilaatillugu imm. 1-imi 2-milu aalajangersakkat immikkut ittumik akuersinikkut sanioqqussinnaavai.

§ 9. Immikkoortut aappaani qaammatini 18-ini sulilluni sungiusartoqassaaq. Sulilluni sungiusarneq radiomik tv-millu ingerlataqarfanni aammalu naqitanik tusagassiorfinni ingerlanneqartassaaq. Sulilluni sungiusarneq nalinginnaasumik Kalaallit Nunaanni pisassaaq.

Imm. 2. Sulilluni sungiusarfusussaq Ilinniagaqarnermi Siunnersuisoqatigiinnit akuerineqarsimassaaq. Sulilluni sungiusarfusussaq aatsaat akuerineqartassaaq ikinnerpaamik tusagassiortoq ilinniarsimasooq ataaseq sulilluni sungiusarfusussami sulisorineqarpat.

Imm. 3. Piffissat sulilluni sungiusarfusut ilinniartup makkuninnga atugassaqaqtitaalluni ingerlattassavai:

- 1) ilinniartooq sulilluni sungiusarfissamut akuerisaasumut sulilluni sungiusarnissaminik nammineerluni qinnuteqaateqartassaaq.
- 2) Tusagassiornermik Ilinniartarfik aamma sulilluni sungiusarfissaq sulilluni sungiusaatissat pillugit

isumaqatigiissuteqartassapput. Sulilluni sungiusarnissaq pillugu isumaqatigiissutit naapertorlugit ilinniartoq sulilluni sungiusarfimmi sulinermut peqataasussaataavoq.

3) Ilinniartup sulilluni sungiusarfimmi akisussaasumik ilitsersuisoqarnissaa aamma sulilluni sungiusarnerup akuttunngitsunik naliliiffigineqartarnissaa Tusagassiornermik Ilinniarfiup qularnaagassaraa.

Imm. 4. Sulilluni sungiusarnerup ilaa tusagassiortutut suliffimmi, ilisimatusarfimmi imaluunniit Kalaallit Nunaanni avataaniluunniit ilinniarfimmi pisortanit akuerineqartumi ilinniarnertut sivilunerpaamik qaammatini arfinilinni ingerlanneqarsinnaavoq. Tusagassiornermik Ilinniarfiup taama ilinniakkanik ingerlatsineq akuerissavaa aammalu ilinniartoq ilinniartutut suliqatigalugit ingerlanissaa aqqissuutissallugu. Taama ilinniakkanik ingerlatsineq ilinniartutut ataatsimit imaluunniit ilinniartutut arlariinnit ataatsimoortutut ingerlanneqarsinnaavoq.

Ilinniarnerup immikkoortuini suliassat inaarutissamillu soraarummeerusiorneq

§ 10. Immikkoortumi siullermi ilinniartoq nammineerluni sammisamik suliamik nammineq toqqakkaminik suliagassaaq aamma sammisamik tusagassiuummillu nammineq toqqakkaminik suliagarluni.

§ 11. Ilinniarnermut naammassissutit ilinniagaqartoq ilinniarnermi immikkoortut pingajuanni inaarutissamik soraarummeerusiusaaq. Ilinniagaqartoq nammineerluni sulissaaq, kisiannili sioqqutsisumik siunnersorneqareertassalluni. Sammisaaq tusagassiuullu atorineqartussaaq nammineq toqqarneqassapput.

Ilinniagaqarnermi peqataaneq, ingerlaqqinneq, anisitaaneq unitsitsiinnarnerlu

§ 12. Ilinniartoq ilinniagaqarnermini peqataanissaminut pisussaaffeqarpoq.

Imm. 2. Ilinniagaqarnermi peqataaneq ilinniartitsinermit aalajangersimasunik pilersaarutigineqartunut sammisaqarfusunullu peqataanertut suliassanillu tunniussisarnertut nalunaarsorneqartassaaq.

§ 13. Ilinniartoq ilinniarnertup immikkoortuaniit ilinniarnertup immikkoortuanut tulluuttumut ingerlariaqqitsinnagu ilinniagaqarnermi peqataanera, tak. § 12, imm. 2, ilinniarfiup pisortaanit akuerineqartassaaq, takuulli imm. 5. Ilinniartup ilinniagaqarnermi peqataanera akuerineqarsinnaanngippat ilinniartup ukiumik ilinniartutut tamakkiisumik ilaannakortumilluunniit uteqqiinnissaa pisortamit akuersissutigineqarsinnaavoq.

Imm. 2. Immikkoortut aappaannik aallartitsinissaminut ilinniagaqartoq immikkoortumi siullermi suliani marlunni pineqartuni minnerpaamik karakteri 6 angusimassavaa, tak. § 10 aamma ilinniagaqarnermi peqataaneq, tak. imm. 1, akuerineqarsimassaaq.

Imm. 3. Immikkoortut pingajuannik aallartitsinissamut ilinniagaqartup immikkoortut aappaanni sulilluni sungiusarluni peqataasimanera akuerineqarsimassaaq. Taamaattoorli ilinniarfimmi pisortaq, pissutsit immikkut ittut tamanna pisariaqalersippassuk, ilinniarnermi immikkoortut arfineq-aappaannik aallartitsisoqarnissaanut akuersissuteqarsinnaavoq, naak sulilluni sungiusarneq ataaseq arlallilluunniit akuerineqarsimannikkaluartut.

Imm. 4. Ilinniartut ilinniagaqarnermi peqataanerat akuerineqarsimannikkaluarpalluunniit, tak. imm. 1, ilinniartitaanermi immikkoortup tullianut ingerlaqqikkumallutik pisortaq qinnuteqarfigisinnaavaat. Immikkut akuersissuteqarneq nalunaarutigineqarsinnaavoq ilinniartoq suliassaminik suliareriigassaraluaamut taarsiussumik Tusagassiornermut Ilinniarfiup piumasarisaanik allattariarsukkamik tunniussippat. Ilinniagaqarneq nangeqqinneqassappat suliag naammaginartutut nalilerneqarsimassaaq.

§ 14. Ilinniartfimmi pisortaq aalajangiisinnaavoq ilinniagaqartuq ilinniartitaanermit anisitaassasoq ilinniagaqartuq

- 1) arlaleriarluni sivisuumilluunniit § 12 naapertorlugu pisussaaffimminik naammassinnissimangippat naak allakkatigut eqqaasinneqartaraluarluni tamatumalu kingornatigut allakkatigut mianersoqquneqaraluarluni,
- 2) ilinniagaqartut allat ilinniartfulluunniit sulisuisa peqatiginissaannut maleruagassat nalinginnaasut sakkortuumik sumiginnarsimappagit,
- 3) ataavartumik nappaateqarnermik, nakorsaatinik aanngajaarnartunilluunniit atornerluinermik assigisaannilluunniit pissuteqartumik allat peqqissuunissaannik isumannaatsuunissaannilluunniit ima akornuseeratarsinnaappat allaat ilinniartoqatiminut akornutaasinnaalluni, imaluunniit
- 4) ilinniartoq ilinniakkaminik ingerlatsiinnarnissaminut erseqqissumik naleqqutinngitsunik iliuuseqarsimappat.

§ 15. Ilinniarteq unitsitaq aatsaat ingerlateqqilerneqarsinnaavoq ilinniartunngoqqinnissamik qinnuteqareernikkut, tak. § 5.

Imm. 2. Taamaattoq pissutsit immikkut ittut atuutsillugit ilinniartfimmi pisortap akuersineratigut ilinniarteq sulilluni sungiusarfissaqannginnermik pissuteqartumik, ilinniartitaanermik unitsitsigallarnermi taamatuttaaq naartunerup erninerullu nalaani ilinniartnermik unitsitsigallarnermi aamma napparsimanermik uppersaatalimmik pissuteqartumik peqataannginnermi unitsikkallagaq aallarteqqinneqarsinnaavoq.

Ilinniagassatut sammisani ataasiakkaani siunertarineqartut

Imm. 1

§ 16. Ilinniagassatut sammisami tusagassiornermi ilinniartut makkuninnga angusaqarnissaat siunertaavoq:

- 1) tusagassiornermi tunngaviusumik ilisimasaqalerneq, soorlu nutaarsiassanik eqikkaaneq, nutaarsiassanik nalunaaruteqarneq, apersuineq, imartuumik tusarnaagassiorneq, tunuliaqutsiisunik allaaserisaqarneq aammalu eqqartuussivinni imaqarniliortarneq.
- 2) tusagassiortutut periaatsinik atuinissamik sungiusarneq,
- 3) nutaarsiassat suunerannik immikkoortiterisinnaanermik ilisimasaqalerneq,
- 4) eqqaamasassanik allattuiguarsinnaanermik ilikkagaqarneq aammalu misissuinermi atugassanik aaqqissuussinermik sungiusarneq,
- 5) tusagassiortutut sunnarniarneqarsinnaanermik ilisimaarinninneq aammalu tusagassiornermi pitsaasunik ileqqorissaarnissamik/pissuserissaarnissamik ilisimaarinninneq, aamma
- 6) sulianik naammassineqareersimasunik aaqqissuussinermik sungiusarneq.

§ 17. Ilinniagassatut sammisami inuiaqatigiilerinermi anguniagaapput ilinniartut inuiaqatigiit aaqqissuussaananerannik ineriartortitsivigineqarnerannillu ilisimasaqalernissaat, taamaaliornikkut paasissutissanik makkununga tunngasunik naliliisarlutik misissuueqqissaarsinnaangortillugillu ajornartorsiutinik erseqqissaasinnaangortillugillu siaruarterisinnaalersissallugit:

- 1) nunatsinni naalakkarsuinnikkut ingerlatsinermut,
- 2) aningaasarsiornermut, aamma
- 3) eqqartuussiveqarnermut.

§ 18. Ilinniagassatut sammisami oqaatsini anguniagaavoq ilinniartut

- 1) kalaallit oqaasiisa pissuseqatigiinnerannik uiguusersuinermillu ilisimasaqalissasut

- 2) tusagassiornermi oqaluttuariaatsinik ilisimasaqalernissaat,
- 3) tusagassiuinermi oqaatsit atorneqartut atuaruminartuunissaat, aamma
- 4) paasinarluartumik naleqquttumillu tusagassiuinermut oqaatsitigut tunngaviusumik pisinnaasassanik ilisimasaqarlualernissaat.

§ 19. Tusagassiorneq attaveqaqatigiinnerlu pillugit isumaliutersuutinik ilinniagassatut sammisami anguniagaavoq ilinniartut makku pillugit ilisimasaqalernissaat

- 1) nunatsinni avataanilu tamat attaveqaqatigiinnerisa tusagassiuisarnerullu oqaluttuarisaanerani pingaernerit, tamakkununnga ilanngullugit tusagassiuutit sunniutaannik paasisimanninneq, aamma
- 2) tusagassiornermik sulinermi atukkat, aaqqissuisoqarfiit aaqqiissuussaasernerannut tunngaviit aamma tusagassiuutit inuillu atuisut akornanni pissutsinik paasisimasaqarnissaq.

§ 20. Tusagassiiisarnerni malittarisassat pillugit ilinniagassatut sammisami anguniagaapput ilinniartut makku pillugit ilisimasaqalernissaat

- 1) kikkulluunniit naqisimaneqaratik oqaaseqarsinnaanerit inatsisini tunngaviusuni illersugaasoq tamatumalu inatsisitigut killiligaanera, tamakkununnga ilanngullugit inuit ataasiakkaat toqqissisimasumik inuuneqarnissaasa innimiilliorfigineqannginnissaannik aamma inoqatinut nikanarsaataasunik oqaaseqartannginnissamut pinerluttulerinermi inatsimmi aalajangersakkat kiisalu piginnittussaataitanermut tunngaviusumik aalajangersakkat pingaarutillit,
- 2) tusagassiiisarnerni akisussaassuseqarneq pillugu inatsimmi malittarisassat, tusagassiuinermi ileqqut pitsaasut, akissuteqarsinnaatitaaneq aamma Tusagassiuisarnerit pillugit Aalajangersaasarfik, aamma
- 3) Inatsisiliortarnerni, allaffissornikkut ingerlatsinerni aamma eqqartuussisarnerni tamanut tusarliisarnermut tunngaviit.

§ 21. Ilinniagassatut sammisami ileqqorissaarnermi/pissuserissaarnermi siunertarineqarpoq ilinniartut makku pillugit ilisimasaqalernissaat

- 1) tusagassiornermi ileqqussat pitsaasut pillugit malittarisassat allassimasut allassimanngitsullu malittarisassat, aamma
- 2) misissueriaatsini assigiinngitsuni ileqqorissaarnermi/pissuserissaarnermi ajornartorsiutaasartut isumaliutigisariaqartullu.

Imm. 2

§ 22. Sulilluni sungiusarnermi ilinniartut sulianik ilinniakkaminnut tunngasunik nalinginnaasunik aaqqiissuussinermillu misilittagaqalernissaat kiisalu nammineeertutik sulisalnissaminnut pisinnaasaqalernissaat anguniagaapput.

Imm. 3

§ 23. Ilinniagassatut sammisami tusagassiornermi tusagassioriaatsinik tusagassiorutullu sulinermik ilinniartitaanerup immikkoortuani siullermi ilitersuutigineqartartunik ilinniartut suli annerusumik ilisimasaqalernissaat sungiusarnissaallu anguniagaapput, taakkununnga ilanngullugit tusagassiassanik pilersarusiornermik sungiusarnerit.

§ 24. Ilinniagassatut sammisami inuiaqatigiilerinermi anguniagaapput ilinniartut nunani tamalaani paasinnittaatsinik paasisimasaqalernissaat nunani tamani pisunik naliliisarluni misissueqqissaarsinnaalersitsisunik, ajornartorsiutitaannik erseqqissaasinnaalersitsisunik ingerlatitseqqissinnaalersitsisunillu aamma tamakkua tunuliaqutaannik kingunerannillu.

§ 25. Oqaatsinut tunngasunik ilinniagassatut sammisami siunertaavoq ilinniagaqartut:

- 1) oqaluttuariaatsinik sukumiisumik ilisimannilernissaat,
- 2) oqaatsit sakkutut atornissaat pillugit isumaliutersornikkut sulinikkullu misissuisarnerminni suliaminnik itisilerisinnaalissasut, tamakkununga ilanngullugit tusagassiortutut saqqummiussisinnaanerit, pisunik ilungersunartunik saqqummiussisinnaalernerit kiisalu isumassarsiorluni oqaatsinik atuisinnaanermut tunngasut,
- 3) naliliisarluni misissueqqissaarsinnaalernerit ilinniarnep immikkoortuani siullermi sammineqartut ineriartorteqqissagaat, aamma
- 4) tusagassiornermi ileqquliussatut periaatsit atorlugit atornagillu pissusissamisoortumik, oqitsumik paasiuminartumillu allassinnaanngornissaat.

§ 26. Inaarutissamik soraarummeerusiornissap suliarineqarnissaani siunertarineqarpoq ilinniartut tusagassiornermi periaatsinik ilikkarsimanerisa nammineerlutillu sulisinnaalersimanerisa uppernartunngortinnissaat.

Kapitali 4.

Ilinniartitaanermi misilitsinnerit il.il.

Ilinniartitaanermi misilitsinnerit siunertaat

§ 27. Ilinniartitaanermi misilitsinnerit siunertaraat ilinniagaqartup pisinnaasaqarfisa anguniakkanut piunasaqaatinullu ilinniartitaanermut peqqussummi nalunaarummilu matumani kiisalu ilinniakkamik aaqqissuussinnermi aalajangersakkanut naapertuunnerisa naliliivigineqartarnissaat. Misilitsinnerni angusinerit soraarummeersimanermut allagartamik tunniussinissamut tunngaviliisuusassapput.

Ilinniarfimmit avataanillu naliliisoqarluni misilitsinnerit nassuiaataat

§ 28. Misilitsinnerit ilinniarfimmit avataanilluunniit naliliisoqarluni pisarput.

Imm. 2. Ilinniarfimmit naliliisoqarluni misilitsinnerit tassaapput misilitsinnerit soraarummeersitsisumit ataatsimit arlalinnilluunniit naliliivigineqartut.

Imm. 3. Avataanit naliliisoqarluni misilitsinnerit tassaapput misilitsinnerit soraarummeersitsisumit ataatsimit arlalinnilluunniit aamma censorimit, Ilinniartitaanermut Pisortaqaqfimmit taamatut pisussaaffiligaasumit naliliivigineqartut.

Allattariarsornermi misilitsinnerit

§ 29. Allattarissanik misilitsinnerit Tusagassiornermik Ilinniarfimmit suliarineqartassapput.

Imm. 2. Misilitsinnerit soraarummeertussanut tamanut ataatsimut assigiissapput.

Imm. 3. Misilitsinnerni nakkutilliisoqartassaaq.

Imm. 4. Ilinniartitaanerup ingerlanerata naareernerani ilinniartut misilitsittarnerminni allattarissanik akissutigisimasatik imminnut tunniuteqqusinnaavaat.

Oqaluttariarsornermi misilitsinnerit

§ 30. Soraarummeersitsineq ilinniartitsissutitut sammisamik soraarummeerutaasumik ilinniartitsisuusumit ilinniartitsisuusunilluunniit ingerlanneqassaaq, taamaalilluni ilinniartitsisoq tassaassalluni soraarummeersitsisoq. Soraarummeersitsineq sapinngisamik soraarummeersitsisup soraarummeertullu akornanni oqaloqatigiinnertut ilusilersugaassaaq, tassanilu censori peqataasinnaalluni.

Atortut ilinniagaqartup ilinniartitsissutitut sammisanik suliaqarneranut annertunerusumik uppersaatitut iluaqutigineqarsinnaasut soraarummeersitsinermit ilanngunneqarsinnaapput.

Imm. 2. Censori soraarummeersitsisorlu naliliiniarnermi kisimiissapput. Soraarummeertoq naliliisoqareerneratigut karakterissatut aalajangiunneqartoq pillugu tunngavilersugaasumik ilisimatinneqarsinnaavoq.

Imm. 3. Ilinniagaqartoq piareersarnissamut piffissaqartitaasimappat tamanna nakkutilliisoqarluni pissaaq.

Imm. 4. Oqaluttariarsornermi misilitsinnerit tamanut ammasuupput.

Misilitsinnerit naliliisarnerillu

§ 31. Ilinniartitaanerup immikkoortua siulleq misilitsinnernik naliliinernillu makkuninnga imaqarpoq:

1) Tusagassiorneq: Ilinniartup naammassiniarlugit sulianut tamanut peqataasimanera nalilernerqartassaaq ima: "angusivoq" imaluunniit "angusinngilaq". Tusagassiornermik suliat ilinniartumit suliarineqartut tunngavigalugit avataaneersunik naliliisoqarluni misiliisoqartassaaq.

2) Inuiaqatigiilerineq: Ilinniagaqartup ilinniartitaanerit immikkoortortaannut nunatsinni naalakkersuinikkut pissutsinut, aningaasaqarnermut aamma eqqartuussiveqarnermut peqataasimanera nalilernerqartassaaq ima: "angusivoq" imaluunniit "angusinngilaq". Ilinniartitsissutitut sammisaq naggaserneqartassaaq avataaneersunik naliliisoqarluni oqaluttariarsornikkut misilitsinnermik.

3) Oqaatsit: Ilinniartup ilinniartitaanerup immikkoortuani oqaluttuariaatsitigut periaatsini peqataasimanera nalilernerqartassaaq ima: "angusivoq" imaluunniit "angusinngilaq". Avataaneersunik naliliisoqarluni kalaallisoornermik misilitsittoqartassaaq.

4) Tusagassiorneq attaveqaqatigiinnerlu pillugit atuagarsornikkut ilisimasassat kiisalu tusagassiiinnermi malittarisassaqarne aamma ileqqorissaarneq / pissuserissaarnerlu: Ilinniartup ilinniartitsissutitut sammisani peqataanera sammisani tamani immikkut nalilernerqartassaaq ima: "angusivoq" imaluunniit "angusinngilaq".

Imm. 2. Ilinniartitaanerup immikkoortuani siullermi suliat tusagassiorneqatut piginnaasat tamatigoortut tunngavigalugit nalilernerqartassapput, tamakkununga ilanngullugit paasissutissanik katersisarnerit kiisalu oqaatsinik atuineq paasissutissanillu siaruarterineq.

Imm. 3. Ilinniartitaanerup Pisortaqaarfik, pissutsit immikkut ittut pisariaqartissappassuk ilinniartitaanerulluunniit ineriartortinneqarneranut atatillugu imm. 1-imi aamma 2-mi aalajangersakkanik immikkut ittumik akuersinikkut sanioqqutitsisnaavoq.

§ 32. Ilinniartitaanerup immikkoortuata aappaani piffissat sulilluni sungiusarfiusut tamarmik naaneranni sulilluni sungiusarnermik naliliisoqartassaaq piffissami sulilluni sungiusarfiusumi ilinniartup peqataanera nalilernerqartassalluni ima: "akuerineqarpoq" imaluunniit "akuerineqanngilaq". Sulilluni sungiusarfiusuni akisussaallutik pisortat peqatigalugit sulillutik sungiusartut aamma Tusagassiornermik Ilinniarfik, sulilluni sungiusarnerit nalilissaavaat, tamatumani ilinniartup sulilluni sungiusarnermini takkuttarnera aamma sulinera minnerpaamik naliliiffigineqassallutik.

Imm. 2. Piffissap sulilluni sungiusarnerup ilassutaasup naalernerani § 37 naapertorlugu imm. 1-imi allaaserineqartutut naliliisoqartassaaq.

Imm. 3. Ilinniartitaanerup Pisortaqaarfik, pissutsit immikkut ittut pisariaqartissappassuk ilinniartitaanerulluunniit ineriartortinneqarneranut atatillugu imm. 1-imi aamma 2-mi aalajangersakkanik immikkut ittumik akuersinikkut sanioqqutitsisnaavoq.

§ 33. Ilinniarnernup immikkoortuisa pingajuanni ilinniartitsissutini tusagassiornermi, inuiaqatigiilerinnermi aamma oqaatsini ilinniartup peqataaneranut "angusivoq" imaluunniit "angusinngilaq" naliliissutigineqassapput.

Imm. 2. Inaarutissamik soraarummeerusiorneq avataaneersumik naliliisoqarluni oqaluttariarsorlunilu misilitsinnermi nalilerneqassaaq, tamatumani ilinniartup sammisaminik toqqaanini, suleriaatsini aamma paasissutissanik katersinini nassuiassavai. Naliliineq ingerlanneqassaaq soraarummeersitsisumit, censorimit ataatsimit kiisalu suliamut aalajangersimasumut tassunga peqataasussanngortinneqarluni immikkut ilisimasalimmit, tak. § 42.

Imm. 3. Ilinniartitaanermut Pisorta qarfik, pissutsit immikkut ittut pisariaqartissappassuk ilinniartitaanerulluunniit ineriartortinneqarneranut atatillugu imm. 1-imi aamma 2-mi aalajangersakkanik immikkut ittumik akuersinikkut sanioqqutitsisinnaavoq.

Ilinniarnermi misilitsinnernut peqataanissamut nalunaarneq piumasaqaatillu

§ 34. Ilinniartuq ilinniartunngornermigut ilinniarnermi misilitsinnernut peqataasussatut nalunaarpoq.

§ 35. Ilinniagaqarnermi peqataaneq, tak. § 12, akuerineqarsimassaaq ilinniartitsissutitut sammisani ataasiakkaani ilinniartuq misilitsinnerni peqataatilersinnagu.

Misilitseqqittarneq

§ 36. Ilinniartuq ilinniartitsissutini tamani 6-imit appasinnerusumik karakterilerneqarsimagaangami misilitseqqinniarsinnaavoq.

Imm. 2. Ilinniartuq ilinniartitsissummut ataatsimut marloriaannarluni misilitseqqinniarsinnaavoq.

Imm. 3. Ilinniartitaanermut Pisorta qarfik, pissutsit immikkut ittut pisariaqartissappassuk imm. 1-imi aamma 2-mi aalajangersakkanik immikkut ittumik akuersinikkut sanioqqutitsisinnaavoq.

§ 37. Ilinniartup sulilluni sungiusarnera akuerineqarsinnaanngitsutut nalilerneqarpat tamatumani akuerineqanngitsortai ataasiarluni uteqqissinnaavai.

Imm. 2. Ilinniartuq maanaannakkut sulilluni sungiusarnerminik unitsitsippat sulillunilu sungiusarneq ilinniarfimmi allami imaaliiallaanaq nangeqqinneqarsinnaanngippat sulilluni sungiusarneq pillugu naliliisoqassaaq ilinniarfik sulillunilu sungiusarfik naliliinissamut naammattunik tunngavissaqarneranik isumaqatigiippata. Akerlianik pisoqarpat ilinniartuq sulilluni sungiusarnerminik uteqqiisariaqassaaq.

§ 38. Ilinniartuq nappaammik taamaaqataanilluunniit nakorsamit uppersarsaatitaqartinneqartumik takkutinngitsoortarnernik tamatumunngaluunniit naligitinneqartumik pissuteqarluni misilitsinnikkuni Ilinniartitaanermut Pisorta qarfiup pisuni ataasiakkaani tamani aalajangernera naapertorlugit misilitsissaaq, misilitsinnerli taanna kingusinnerpaamik pissaaq ilinniartitsissutitut sammisaaq pineqartuq tullissaanik misilitsiffulerpat.

§ 39. Ilinniartuq misilitsikkiartunngippat, tak. § 38, misilitsinnermullu peqataassanani nalunaaruteqanngippat, misilitsinneq angusiffiunngitsutut naatsorsuunneqassaaq.

Soraarummeerutissat aamma apeqqutit soraarummeerfusussat

§ 40. Soraarummeerutissat tassaapput ilinniartitsissutitut sammisani ataasiakkaani misilitsinnerni ilinniartup soraarummeerutigisai. Soraarummeerutissat ilinniartitsisumit ilinniartitsisunilluunniit ilinniartitsissummik aalajangersimasumik ilinniartitsisutitut sammineqartut akornannit ilinniartup oqaloqatigineqareerneratigut toqqarneqassapput.

Imm. 2. Apeqquutit soraarummeerfusussat tassaapput apeqquutit soraarummeersitsinermi tunngavigineqartut. Apeqquutit soraarummeerfusussat ilinniartitsisumit imaluunniit ilinniartitsisunit ilinniartitsissutitut sammisami ilinniartitsisuusunit suliarineqassapput.

Imm. 3. Taamaattorli soraarummeertussap tusagassiatut suliaa soraarummeerutigineqassappat tusagassiatut suliaq soraarummeersitsinermi tunngavigineqassaaq.

§ 41. Soraarummeerutissat apeqquutillu soraarummeerfusussat kingusinnerpaamik soraarummeernissaq sapaatip-akunnerinik sisamanik sioqqullugu censorimut akuerisassanngorlugit saqqummiunneqassapput.

Imm. 2. Soraarummeerutissanut apeqquutinullu soraarummeerfusussanut oqaaseqaatit tiguneranniit ullut arfineq-marluk qaangiutsinnagit saqqummiunneqassapput. Tamatuma kingorna Tusagassiornermik Ilinniartitsissutitut tigusaqarsimanngippat censori soraarummeerutissanik apeqquutinillu soraarummeerfusussanik akuersisutut isigineqassaaq.

Imm. 3. Soraarummeertussap suliaa soraarummeersitsinermi tunngavigineqassappat, soraarummeerutissaq taanna soraarummeernissaq sapaatip-akunneranik ataatsimik sioqqullugu censorimut misissugassanngorlugi nassiunneqassaaq.

Imm. 4. Soraarummeertussap tusagassiatut suliaa soraarummeersitsinermi tunngavigineqassappat, soraarummeerutissaq taanna soraarummeernissaq sapaatip-akunneranik ataatsimik sioqqullugu censorimut misissugassanngorlugi nassiunneqassaaq. Tusagassiornermik Ilinniartitsissutitut tusagassianik naliliinermi tunngavigisartagai nalinginnaasut ilanngullugit aamma nassiunneqassapput.

Censorit aamma sulianik ilisimasallit

§ 42. Ilinniartitaanermut Pisortaqarfik censorinik ivertitsisussaavoq. Censorit ilinniartitsissutini tamani avataaneersunik naliliisoqarluni soraarummeerfusuni peqataasassapput.

Imm. 2. Inaarutissamik soraarummeerusiap nalilerneqarnerani, tak. § 33, imm. 2, Tusagassiornermik Ilinniartitsissutitut toqqarneqassaaq suliamik ilisimasalik peqataatitaasussaq sammisanik inaarutissamik soraarummeerusiornermi pineqartunik immikkut ilisimasalik. Suliamik ilisimasalik censoritut ivertitatut maleruagassaqartitaalluni aningaasarsisinneqassaaq.

§ 43. Censorit nakkutigissavaat:

- 1) ilinniarnermi misilitsinnerit, taakkununga ilanngullugit suliat allattariarsukkat, siunertanut peqqussummi, nalunaarutini ilinniarnermillu aqqqissuussinermi aalajangersarneqartunut naapertuunnersut,
- 2) misilitsinnerit ilinniartitaanermut malittarisassat atuuttut naapertorlugit ingerlanneqarnersut, aamma
- 3) ilinniartut assigiimmik naapertuilluartumillu pineqarnersut aammalu takutitsinerit tutsuiginartumik karakteriliisarnermi malittarisassat malillugit nalilerneqarnersut.

Imm. 2. Sulianik ilisimasalittut toqqarneqartup censori soraarummeersitsisorlu inaarutaasumik soraarummeerusiornermi paasisutissat pillugit ilinniartup nassuiaanerata ilumuussusia pillugu ilitersuisuusassapput. Paasisimasalittut aggersagaq naliliinerni peqataasassanngilaq.

Misilitsinnerni pissusissaritinneqartunik saneqqutsinerit

§ 44. Ilinniartitsissutitut pisortaq ilinniarnermi misilitsinnerit nalunaarut manna naapertorlugi ingerlanneqartarnissaannut akisussaavoq.

Imm. 2. Misilitsinnerni pissusissaritinneqartunik saneqqutsinerit ingerlaannartumik Ilinniartitaanermut Pisortaqarfimmut nalunaarutigineqartassapput.

§ 45. Ilinniartitaanermi pisortaq ima pisoqarpat soraarummeertumik anisitsisinnaavoq:

- 1) soraarummeertoq unioqqutitsilluni allanik ikiortissarsippat, atortunik akuerisaanngitsunik atortoqarpat imaluunniit allap suliaa suliamisut saqqummiuppagu, imaluunniit
- 2) soraarummeertoq unioqqutitsilluni misilitsinnermi allamik ikiuippat ikiuniarsimappalluunniit.

Kapitali 5.

Karakteriliisarneq

§ 46. Ilinniartitsissutini assigisaannilu misilitsisiviisuni katakteeriliinnermi 13-skala atorineqartassaaq.

Kapitali 6.

Angusinissamut piumasaqaatit

§ 47. Tusagassiorlutut ilinniarnermi angusinissamut piumasaqaataapput:

- 1) pikkorissartitsinerit ilinniarnerrillu ilinniartitaanermut ilaasut tamaasa aamma sulilluni sungiusarnerit ilanngullugit qaqisiffigineqarsimassasut imaluunniit akuersissutigineqarlutik, aamma
- 2) karakteriliunneqartut tamarmik minnerpaamik 6-imiissasut tassanngaluunniit qaffasinnerullutik.

Kapitali 7.

Nalunaarsuiffit aamma soraarummeernermut uppersaatait

§ 48. Ilinniarfimmi pisortaq ilinniartunut tamanut nalunaarsuiffissamik allattuiffeqassaaq. Ilinniartoq pillugu inuttut paasissutissat, ilinniartitsissutitut sammisat toqqagai, uppersaatait, nalunaarut malillugu peqataannginnissamut allatullu peqataannginnissamut immikkut pineqarnissamut akuersissutit sulillunilu sungiusarnerit aamma misilitsinnermi karakterit nalunaarsuiffimmut allattorneqartassapput.

§ 49. Ilinniartut Tusagassiornermik Ilinniarfimmi angusisimasut soraarummeernermut uppersaammik pissapput. Uppersaataat inunlut ataasiakkaanut tamanullu atuuttunik paasissutissartaqartassaaq.

Imm. 2. Inunlut ataasiakkaanut tunngasortaani nalunaarutigineqartassapput:

- 1) ilinniartoq pillugu inuttut paasissutissat aammalu ulloq ilinniarnerrup naammassiffia
- 2) sulilluni sungiusarnermi ilinniarnerni naliliinerit, aamma
- 3) ilinniartitsissutitut sammisani ataasiakkaani tamani naliliinerit, suliat aamma inaarummik soraarummeerusiorluni suliaq.

Imm. 3. Oqaasertani tamanut atuuttuni nalunaarummi §§ 7, 8 aamma 47 ilanngunneqartassapput.

Imm. 4. Soraarummeernermut uppersaata ilinniarfimmi pisortamit ilinniartoq pillugu allattukkat tunngavigalugit suliarineqassaaq. Ilinniarnermi pisortap uppersaata atsiussavaa.

Imm. 5. Ilinniartoq ilinniarnernimik naammassinnginnermini unitsitsiinnarsimasoq misilitsinnerit aamma sulilluni sungiusarnerit akuerineqarsimasut pillugit uppersaataitaannik piumasinnaavoq.

Kapitali 8.

Atuutilerfia

§ 50. Nalunaarut ulloq 1. august 2001 atuutilerpoq. Ilinniartut 1997-imi decembarip aallaqqaataa sioqqullugu sulilluni sungiusarnermik nalinginnaasumik aallartitsisimasut ulloq taanna tikillugu malittarisassat manna tikillugu atuuttut naapertorlugit ilinniarnerninnik naammassinissapput.

Imm. 2. Tamatumunnga peqatigitillugu tusagassiorlutunngorniartunik ilinniartitsineq pillugu

Namminersornerullutik Oqartussat nalunaarutaat nr. 43, decembarip 22-anni 1993-imeersoq atorunnaarsinneqarpoq.

Namminersornerullutik Oqartussat, ulloq 26. juli 2001.

Lise Lennert

/

Karl Kristian Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut